



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 7

July 20 anogo tashi nunga ni
taküm alitsü: Sonam Wangchuk

2020 election nung
China-i teka sangshi: Trump

VOL. XXIII ISSUE NO. 275 (ADOK 275)

DIMAPUR

KÜPTOKNÜ (SATURDAY)

CHITENI (JULY) 18, 2026

₹ 5.00

Vande Mataram atentsü atema ozüing yanglutsü

New Delhi, July 17, 2026 (Agencies): Centre sorkari linük indang national anthem Jana Gana Mana ama national song Vande Mataram kümzüka ayutsü meranger.

July 20, 2026 nungi Parliament Monsoon Session tenzüksü lir aser iba mapang Centre-i bill benöksü renemogo.

"Prevention of Insults to National Honour (Amendment) Bill, 2026 ajanga 1971 ozüing yanglushitsü. Iba ya national flag aser Constitution kümzüka ayuba ozüing lir aser iba alema inyakterem küm asem tashi tepuokdak ayutsü, senchi achitsü mesüra temerenshi anaprong angutsü akok" ta Lok Sabha secretariat-i metetdaksüogo.

Iba bill ajanga Vande Mataram mezüingmeshiba mesüra meinprongba inyakyimtem Prevention of Insults to National Honour Act, 1971 kübok dendaktsünür.

Vande Mataram ya Bankim Chandra Chattopadhyay-i 1875 nung züluba sülen küm 150 ajungba mapang Centre-i iba bill benöksü.

Union Cabinet-i taküm May ita Vande Mataram ya national anthem den kasa jenjang nung ayutsü mulunga agizüka liasü.

Yaküm December ita Lok Sabha aser Rajya Sabha nung Vande Mataram ken atema ghonda 10 o atsütepa jembia liasü. Prime Minister Narendra Modi-i Lok Sabha nung iba olemtep

tenzükdang Jawaharlal Nehru-i tangar peladaktsütsü asoshi Vande Mataram ken senmang menentsü ta tai tongloksü.

Ajisüaka, Congress-i anir Opposition-i toktepdang non-cooperation movement mapang nüjiso bushirtem apudang iba ken atenba putiotsü bener arua jembi.

Taküm February ita Union Home Ministry-i state tem dang anthem 'Jana Gana Mana' atemba sentong ajak nung national song Vande Mataram atemtsü mesüra atentsü tetuyuba agüja liasü.

Maneni, Home Ministry-isa tan ita tetenzüklen state sorkartem dang national anthem madak Vande Mataram tongti süa beshitsü metetdaksüogo. Official sentong ajak nung anaprong atemtsü/atentsüla ta parnoki ashi.

"Kodang national song aser national anthem tendir mesüra temdir, national song mezüing atentsü mesüra atemtsüla" ta Home Ministry-i chief secretary ajak dangi shidi zülua liasü.

National song nung tekong (stanza) trokprongla atentsüla ta Home Ministry-i züluba shidi nungsa tuyuogo.

1937 nung Jawaharlal Nehru-i anir Congress ajanga Vande Mataram nung mezüing tekong ana dang amshitsü telemtetba agia liasü. Iba ken nung tekong tanga nung Hindu tetsür tsüngremtem tetshia aliba atema Muslim nung ashishitepba agi Congress-i iba lemtet agi.

Parliament nung FCRA Bill, 2026 benöksü

New Delhi, July 17, 2026 (Agencies): July 20, 2026 nungi Parliament Monsoon Session tenzükdang Centre sorkari Foreign Contribution (Regulation) Amendment (FCRA) Bill, 2026 benöksü ta Lok Sabha secretariat bulletin nung metetdaksüogo.

FCRA Bill, 2026 ajanga non-compliant NGOs ket nungi rongsen agitsü atema sorkar nem tashi agütsütsü.

Iba bill ya taküm Budget Session nung benoka liasü saka olemtep maliasü aser iba ya Assembly elections agitsü aliba

Kerala state nungi telok kari anema noktakba ajanga benoka mejembi ama bilemer.

FCRA ozüing yanglushiba nung bendanglen nungi tenla aruba ajanga administrative expenses 25% dang amshitsü lateta lir. Tesüiba nungbo iba ya 50% liasü aser iba Act yanglushira sorkari registration norms alema inyakba NGOs rongsen sottsü aser agitsü tashi agütsütsü.

Tawa tu Khristan lennirtemi Union Home Minister Amit Shah den ajurutepa FCRA Bill, 2026 atema jembiogo.

CNCCI-i bomb pokdaktsüba aitsür

Dimapur, July 17, 2026 (TYO): Chümoukedima District nung tawa bomb ka apokdang jawan ka asüba aser sepai pezü yirutsüba khukhua aitsür ta Confederation of Nagaland Chamber of Commerce and Industry (CNCCI)-i metetdaksüogo.

Tasür kibong den asükhu lemsateper aser yirua alirtem tekaraba nung taneptsü angutsü moatsür ta Media Affairs , CNCCI-i sangdong ka nung ashi.

Nagalandnungalirtem kümaika anepalua aruba sülen yimjung bener

aruba aser tensa süngjema aliba raksatsütsü atema iba mapa inyakogo. Nagaland nung alirtemi küm aika timtema aruba sülen külemi yimjung, olemtep aser terenlok lenmang nung jajatsü shimtetogo. Anungji kija mesüra telok shinga nem-a ibala ozüing alema inyakyim ajanga yimjung meraksadaktsütsü ta pamokisa ashi.

CNCCI-isa ozüing amertem aser bushisüingdangertem dang iba mapa inyakterem maitsü jangjatsü, aputsü aser ozüing kübok temerenshi agütsütsü ayongzükogo.

Manipur nung Naga nunger 6 tepsetba bilemteta sentong agi



July 17, 2026 nü Zeliangrong Public Dimapur-i Supermarket, Dimapur nung Manipur nung Naga nunger 6 tepsetba atema candle light service ayongzüka agidang tangokba noksa angur

Dimapur, July 17, 2026 (TYO): Manipur nung Kuki nungeri Naga nunger trok pur oa tepsetba bilemteta aser tasürtem nem tetushi agüja Zeliangrong Public Dimapur-i Hokolbar nikongdang Supermarket, Dimapur nung candle light service ka ayongzüka agiogo.

Iba sentong nung nisung meyrjang aika aden aser parnoki asür nem tetushi agütsüba den o jembirtemi tasür kibongtem asoshi temeten meshi aser tesütep Act kübok iba mapa inyakterem ajak aputsü aser merenshitsü takhangba agütsüogo.

Naga nunger kibong ka ama longjemtsüla aser kiralongrartemi tashiyim inyakba anema longjemer raratsüla ta o jembirtemisa ashi.

"Sorkari Manipur nung tensa mejungi alidak yimjung bener arutsü asoshi meratem agitsüla aser civilian tem kümzüka ayutsüla" ta Naga Council Dimapur president GK Rengma-i ashi.

United Naga Council (UNC)-i akhangba ama Manipur aser India sorkartemi memenui inyaktsüla. Parnoki akhangba ama meinyakra Kuki nunger aliba tesem ajaklen tensa tamajungba küma aotsü akok ta GK Rengma-isa ashi.

"Asenok yangi candles amtsü

atema dang masü saka nübortem tejashi lemsateptsü atema arua lir. Asenoki khuret abentsü atema adenshiogo. Tanü asenoki candle tilala dang amer saka külemi tesangwa tuluba akümer aser tammang yapoker" ta Naga Women Hoho Dimapur, joint secretary Khriezovonuo Zumvu-i ashi.

"Iba ajanga temenen tulu süaka, ochi menembangtetsü ta asenok dang nenshir. Temeten nembanga meytettsü aser nübortem longjemba tashi madak temeneni takok mangutsü" ta laisa ashi.

"Tang ya asenoki tasü itta jembitsüba mapang ka lir. Tai maketba nisungtem tepsetba aser tai maketba civilian tem amak ya meimchir anema inyakba aser amakba lir" ta Khriezovonuo-isa ashi.

"Tasürtem nem tetushi agüja candle ka tsüklokba yagi meperir. Asenok ka küma longjemba aser külemi noktakba ajanga tasürtem nem tetushi chichiba agütsütsü. Asenok ka kümra, asenoki aika inyaktettsü. Lemtet ka agitettsü aser asen loktiliba nung temenen ajunga samatsütettsü" ta Eastern Naga People's Union Dimapur (ENPUD) president, Thanglong Phom-ia ashi.

"Manipur state sorkar aser

Centre-i iba mapa inyakterem bushitsüla, item kiralongrartem aputsüla aser ozüingi melaba ama merenshitsüla" ta Tenyimi Union Dimapur president Thepfuneito Rio-ia ashi.

"Tasü mang trokprong kanga mejungi sensamasatsür lia anguba atema temulung kanga raksar. Iba taochi maketba mapa ya meimchir anema inyakba lir. Onoki iba tesempatsü mapa khukhua aitsür" ta Lotha Hoho Dimapur, president T. Lotha-ia ashi.

"Iba inyakyim ajanga külem Naga nunger ajak amokmerener aser asenok ola madoki meliteter. Meimchir ajak aser talisa Naga nungertem kolen lidir liaka longjemtsüla aser tasürtem asoshi temeten bushitsüla" ta Ao Senso Telongjem Dimapur president Ningsangwaba-ia metetdaksü.

Ao Senso Telongjem Dimapur (ASTD)-i Zeliang Zeliangrong Public Dimapur aser Naga nunger den külemi noktaker ta paissa ashi.

"Asen lima nung temeten aser ochi alitsü aser ibala taochi maketba inyakyim malitsü mepishir. Tasürtem tanüla anisüngzük ngudakjangma aser Tsüngremi tasür kibongtem nem tesünep agüjangma" ta Zeliang Women Organization Dimapur president Izesile Ramlia-i ashi.

IED apokba indang osang agütsür nem senpet agütsütsü

Dimapur, July 17, 2026 (TYO): Chumoukedima 'A' kübok Khopanullah nung July 13, 2026 nü IED pokdaktsüba atema Dimapur Police Commissionerate-i bushisüingdang tenzükogo aser iba dak sendakba nung osang agütsür nem senpet agütsütsü metetdaksüogo.

Iba mapa inyakterem maitsü jangjatsü mesüra aputsüla osang tejangja agütsür nem Rs 50,000

senpet agütsütsü ta Nagaland Police-i ashi.

Iba tasa atongertem, senotsü agi yarirtem, jenokdaksürtem, anir senzürtrm mesüra iba tatalokba nung yaritepertem maitsü jangjatsüla osang agütsürtem nem-a iba senpet agütsütsü.

Maneni, iba dak sendakba nung explosives, explosive components, weapons, communication devices, vehicles,

mesüra taittsü aketba oset kar dang angutsüla osang agütsür nem-a senpet agütsütsü ta Nagaland Police-isa metetdaksüogo.

Osang agütsünürtemi 7085055003/ 7085055011(Also available on WhatsApp) ajanga tongteptsü akok ta pamokisa ashi.

Osang agütsürtem maitsü miimbanga ayutsü aser nisungtemi osangji miima agütsütsü akok ta police-isa metetdaksüogo.

ATMA Chuchuyimlang Block-i Mongsenyimti nung Farm School semzük



Dimapur, Chiteni/July 17 (TYO): Agricultural Technology Management Agency (ATMA), Mokochung, Chuchuyimlang Block ajanga July 17, 2026 nü Mongseymimti nung Farm School ka semzük aser capacity building sentong ka ayongzüka agia liasü.

Iba mapang sustainable Eri silkworm rearing aser kharif crops indang capacity building indang anogo ka Farm School takok ngua agia liasü.

Yimya balala amshia alu ayimtsü aser aluyimer rongsen lenmang tajungba kumdahtsütsü nükjiding nung iba sentong ya ayongzüka liasü.

Farm School semzükba sentong tenzüka Aolemla Kichu, BTM, Chuchuyimlang Block ajanga pela agizükba o jembi aser farm school nükjiding lemsatepa liasü.

Iba sentong nung shisalen sayur Nungshiyanga-i tajangshiba balala nungi Eri mesen asoshi süngdong anepaluba yimya, tashidak balala azüokba aser Eri mesen metsüba yimyatem sayua liasü.

Iba mapang bleaching powder amshia mesen tepsetba yimya aser rearing shelves yangluba yimyatem sayu aser sentong tembanga shilem agirtemi tebilemba balala asü aser

ajangshibatam lemsatepa liasü.

Maneni Telongjem Food Security Group den kharif crops lu ayimba indang Capacity building sentong ya agi, kong shisalen sayur Abenla B. Jamir, ATM Chuchuyimlang Block ajanga metsü yokba, aonsotsü balala meyoktepa yokba yimyatem sayua liasü.

Lai ayi azüokba, tzü kumzüka ayuba aser süngdong kumzüka ayutsü mera balala agiba indanga sayua liasü. Iba mapang cowpea, sweetcorn, bush bean aser lady's finger amala metsüjang lema agüja liasü. Iba sentong nung nisung 20 dena liasü.

Chümoukedima aser Jalukie nung ASF tenokdangba agiener

Dimapur, Chiteni/July 17 (TYO): Deputy Commissioner, Chümoukedima, Polan John, NCS ajanga sangdong ka nung, African Swine Fever (ASF) poktetba ajanga Toulazouma aser meketa aliba yimtsüngtem nungi ak abenba, tepsetba, ayokba aser ak aser ak shi belenba nokdanga aliba agiener, ta metetdaksü.

Office of the Chief Veterinary Officer, Chümoukedima ajanga sangdonga aliba containment zone nung ASF tashidak meputeti mesüra ak asüba nung tashidak mali ta kuli agütsüba sülen iba totuyuba ya agütsür.

Kasa totuyuba nung Veterinary Department-i maneni tashidak tendanga jajatsü ta ashi. ASF südi ta temulung melemetba case tem tekeraba nung District Administration nem osang agütsütsüla. Departments, village councils aser nüburtem dang iba totuyuba nung aliba ama inyaksü metetdaksür, ta sangdong ajanga ashi.

Ano maneni Deputy

Commissioner, Peren, Hiazu Meru-ia sangdong ka nung, Chief Veterinary & Animal Husbandry Officer Peren nungi osang aruba ama April 25, 2026 nü nungi tenzüka Jalukie Valley nung ak tepsetba, ak shi bener aruba aser ak belenba nokdanga aliba totuyuba agiener, ta metetdaksü.

Ajisüaka ak shi aleper, ayoker, abener aser achir ajunga dang biosecurity mera shidak agitsü, nüngdakba mapang transit challans agütsütsü aser quarantine history documents sayutsü metetdaksüogo.

DC Peren-i tim veterinarian nungi health certificate meshitsü aser Department of Animal Husbandry and Veterinary Services ajanga yanglua aliba hygiene protocols shidak amshitsü metetdaksü.

Paisa yimya balala nung ak shirangba mesüra asüba lira, tekeraba nung Department of Animal Husbandry and Veterinary Services nem osang agütsütsü metetdaksü aser item totuyuba sülen manidaker nem osang agi melaba temerenshi agütsütsü, ta ashi.

Association of Nagaland Literature Board lokti senden amen

Dimapur, Chiteni/July 17 (TYO): Association of Nagaland Literature Boards (ANLB) pur lokti senden July 17, 2026 nü Platinum Hall, NBCC Complex, Bayavu Hill, Kohima nung mena liasü.

Advisor, School Education, Dr. Kekhrielhoulie Yhome-i iba senden nung jembidang, oshi ajanga talisa India ama kin balala alidak kin tilatem indang maitsü yangluba nung shilem tulu agir, ta ashi.

Nüburtem sobaliba tajung kumzüka ayutsü atema lisopur oshi wazüka ayutsü nüngdaker, ta pai ashi.

Foundational level nungi lisopur oshi tem sayutsü tongtipang lir, saka oshi nung takotet tesayurtem peria maliba ajanga primary level nung tetsü oshi sayutsü asaker, anungji tesayurtem pei oshi jembiba tesem nung soita ayutsü nüngdaker, ta Advisor Yhome-i ashi.

Mapang melenshiba den peta alitsü asoshi oshi terenlok nung tasen yangluba, tejanga kumdahtsüba aser tanen makai vocabulary tajungba kumdahtsüba nüngdaker.

Khristan yimsü ajanga shilem tajung agiba indang pai benoka jembidang, Laishiba meyipzükba aser tamangba yimsü nung lisopur oshi amshiba ajanga Naga nunger oshi aika wazüka ayuba nung tongti shilem agia lir, ta pai ashi.

Oshi meteter aser scholars den lungjemer oshi shidak scientific yimya amshia meyipzüktsü tongtipang lir ta pai ashi.

Pai oshi indaktsütsü asoshi kakat ken o meyipzüktsü, textbooks yanglutsü, research agitsü ajungshitsü aser oshi terenlok asoshi institutionalization aser lenir shidak alitsü nüngdakba indanga ashi.

Nagaland nung oshi aika aliba ya tajangzük tulu lir, kong tanur temi pei tetsü oshi, English, Nagamese aser tanga tribal oshitem angazüka ainer, ta pai ashi.

Iba ama oshi balala angazüka jembitetba ajanga tekolok ainer, sobaliba maitsü tashi itshir aser alima nung maongka tajungba angur. State Curriculum Framework-ia tribal oshi tem ajungkettsü meranger, kongreju temi yaritsü, nüburtemi shilem agitsü aser tangatetba tajunglen nungi ajungshiteptsü aser metongshitsütsü nüngdaker, ta Dr. Yhome-i ashi.

Additional Director, School Education, Deenabandhu Panda-ia National Education Policy (NEP) den lirumedema Nagaland nung lisopur oshi wazüka ayutsü aser ajungkettsü tongtipang ta shia liasü.

Tamalen schools aika nung Tenyidie kanga bulua sayua liasü, saka tangbo tribal oshi ajak education system nung amshir

aser taküm academic year nungi Class 9 tashi sayutsü, ta pai ashi.

NEP yagi sobaliba aser oshi wazüka ayuba nung yarir, anungji oshi ajak asoshi maongka kasa agütsür, ta ashi.

Literature boards, School Education Department aser nübur tem lungjemer inyakba asoshi pai pelaba lemsatep aser maneni lisopur oshi tashi itshiba nung lungjemer inyaksü ayongzüka liasü.

Pai nüburtem tsüngta pei oshi tali amshitsü ajungshi aser department indang literature boards-ia yaritsü aser state nung lisopur ajunga indang oshi aintsü aser ajungkettsü atema külemi inyaksü ta ashi.

ANLB tir B. Tingshem Konyak-i pela agizükba o jembidang, Advisor, School Education ajanga Nagaland nung oshi aser literature ajungkettsü atema maneni yariba asoshi pelaba lemsatepa liasü.

Lisopur oshi tejakleni bener aotsü asoshi 2015 küm nungi tajungba nung inyaka arur ta pai ashi aser NLA indang 2019 pangzüng nung local languages 13 bhukumba, oshi terenlok asoshi literature board shia atema state sorkari sen 2 lakh agütsüba, aser tang academic year nungi tenzüka Class 9 tashi state nung yangluba textbooks amshidaktsüba amala inyakyim pai lemsatepa liasü.

(Maneni tapak 8 nung...)

C-Edge College nung 14 buba Freshers' Week mungogo

Dimapur, Chiteni/July 17 (TYO): C-Edge College nung kaketshir tasentem anioka July 10-17, 2026 anogotem 14 buba Freshers' Week sentong balala G.K. Auditorium nung agia liasü.

Sentong tongtiba nung o jembi ama Jenpu Rhakho Rongmei, Founder, CAN Youth & General Secretary, Nagaland Alliance for Children and Womens' Rights aden.

Formal program tenzüka Lipokpenla Ao (BA V Semester) ajanga sarasadem aser Wapanginla Ao, Dean of Management Studies ajanga pela agizükba o jembia liasü.

Iba sülen college choir temi ken ka aten.

Jenpu Rhakho Rongmei-i iba sentong nung kaketshir tasentem ayongzüka aser ajungmesoa jembia liasü.

Daisy Shitio, Dean (Humanities & Social Sciences)-i anir annual college awards agiba mapang "Best Star Attendance Award" ya BA II Semester nungi Zakali Zhimo, BA IV Semester nungi Kaophen C. Phom & Chongmei C. Phom, BA VI Semester nungi Yimtsula K, BBA II Semester nungi Supriya Patnayak, BBA IV Semester nungi Imnamongla Longkumer aser BBA VI Semester nungi Nikhuli Achumi nem agütsü.

Iba sülen College-i academic

high-achievers nem tetushi agüja liasü, kong Khrozo-u Kapfo (BA) nem Department of Psychology nung Nagaland University UG Rank 7 tongtetba asoshi senpet sen 5000 agütsü aser Viwhesieno (Tsuno) Award for Girls Topper ya BBA nungi Nikhuli Achumi aser BA nungi Khrozo-u Kapfo na nem sen 5000 dener agüja liasü.

C-Edge Laurel Award (Even Semester) 2026 ya pei semester nung GPA timtiba nguteter nem agütsü aser parnokji BA IV Semester nungi Inaka Choppy, BA VI Semester nungi Zuthoto Phesa-o, BBA II Semester nungi Supriya Patnayak, BBA IV Semester nungi Imnamongla Longkumer aser BBA VI Semester nungi Nikhuli Achumi nem agütsü.

Kaketshir tasentem tenüng nung Neamkoe S (BA I Semester) ajanga jembi aser seniors tenüng nung Ningthuilu Pamei (BA V Semester) ajanga jembia liasü.

Iba sülen Mr. and Ms. Fresher 2026 Spotlight Walk agia liasü, kong Tokai Yephthomi aser Neamkoe S na Mr. & Ms. Fresher 2026 shima liasü.

Tsutanso aser Endtoli natia iba sentong nung ken aten aser Tsushila Y, Assistant General Secretary, C-Edge College Students' Forum (CECSF) ajanga melepzüng o jembia sentong tembang.

In Loving Memory of
LT. MEJUNGNARO

1 JAN 1940 – 6 JULY 2026



*"I have fought the good fight,
I have finished the race, I have kept the faith."*

2 TIMOTHY 4:7

A LIFE WELL LIVED

Her faith was steadfast, her love was true,
Her kindness touched the lives of many.
A loving mother, a grandmother so dear,
Now rest in God's eternal peace, forever near.

Our family sincerely thank everyone who shared in our grief
through your prayers, visits, messages, and acts of kindness.
Your love and support have brought us comfort during
this difficult time. May the Lord bless you abundantly
for your compassion and generosity.

With sincere gratitude-

Loving Children, In-Laws, Grandchildren
and Great-Grandchildren



July 20 anogotashi nunga ni takümalitsü: Sonam Wangchuk

New Delhi, July 17 (Agencies): Hokolbarnü climate activist, Sonam Wangchuk-i, kechi südir süaka pa July 20 anogo tashi nunga taküm alitsü, ta metetdaksü.

Doctor temi pa anogo aika lumiba ajanga temang shilem aika mejungi raksatsüa akok, ta tekümdangtsü metetdaksüogo.

Anogo 20 nübuba lumia longkak aitba anogo nunga Soman Wangchuk-i pa pusemertem dang July 20 nü Cockroach Janta Party (CJP)-i ayongzüka Parliament tashi longkak aita jajaba nung shilem agiang, ta ayongzü.

India nung agiba exam balala nung ochimashi aliba aser paper leak asüba anema CJP-i anogo 28buba longkak aiter, aser tzüngluruwa mongpu Parliament tenzükba anogo, July 20 nüa longkak aitba sentong tuluka ayongzüka lir.

Longkak aitba tesem nung lokti den jembidang Wangchuk-i, "Tema tereprangtsü nungbo ni tashimait amai, saka telung nungbo ni tashi itta lir. Nenok aika tema-telung ajak tashi itta alitsü ta ni amanger. July 20 anogo

atema asenoki iba tashi ya nüngdaker, kechiyong iba anogo nungji asenoki Parliament tashi longkak aita aotsü. Asenoki longjemer democracy tekülem kidang (Parliament) temepishiba agütsütsü," ta ashi.

Asayamenüa pai, "Kechi südir süaka ni July 20 anogo tashi nunga taküm alitsü. Na marura aser July 20 nü takok mengura ni tanela ka ama arutsü," ta ashi.

Tesüiba ghonda 24 tsüngda Wangchuk temang touzüik gram 350 ajemogo aser pa longkak aitba anogo nungi tenzüka tang tashi nung temang touzüik seret 9.5 ajemogo.

Medical team -i ashiba agi, tang Wangchuk temang touzüik seret 56.55 dang kümogo, blood pressure 108/68 mm Hg, blood sugar 80 mg/dL, pulse rate 72 beats per minute aser oxygen saturation 96% lir.

Pa tesüiba anogo aika lumia longkak aita aruba mapang nung yimtenren lenirtem aser tongtibang nisung aikati pa ajuruogo. Brihostibarnüa AAP tongti lenir Arvind Kejriwal aser Samajwadi Party lenir Dimple Yadav nati pa ajurua liasü.

PM Modi-i India nung tang
mezüng hydrogen train tenzüktsü

New Delhi, Chiteni/July 17 (Agencies): Hokolbarnü Ato kilonser Narendra Modi-i tang linük nung mezüngbuba hydrogen-powered passenger train tenzüktsüogo.

Iba train ji Haryana kübok Jind aser Sonipat na tsüngda senzütsü.

Ato kilonser Modi-i, iba ya Indian Railways atema tongtibang alizüng ka lir, aser 'Make in India' campaign takok anguba tatishitsüka lir, ta ashi.

Iba sentong nung jembidang Modi-i, "Tanü Indian Railways-i tongti mera tuluka agiogo, aser Jind nungi Sonipat tsüngda senzüba train ya alima nung tashi tulutiba train lir," ta ashi.

Iba ya Haryana aser linük atema nümatangtsü lir, ta shia pai, "Kodangsa hydrojen train indang jembidir Jind, Sonipat aser Haryana tetshitsü, iba atema ni linük nem tenüngsang agütsür," ta metetdaksü.

Hydrogen-powered train ya kilometer 89 lenmang (Jind-Sonipat) nung senzütsü. Yimti ana tsüngda railway station 12 nung mapang

tatsütsü anentsü.

Jind railway station nung Ato kilonser Modi-i iba train semzüksüba mapang nung Railway Minister Ashwini Vaishnaw, Haryana Angh Ashim Kumar Ghosh aser Chief Minister Nayab Singh Saini nungera liasü.

Modi-i iba train tenzükja apusoa yok. Train nungji school tanurtem aika liasü.

Hydrogen powered train ya Germany, Japan, China aser United States linüktem nung dang lir, aser tangbo India-a züngsemogo.

India nung tang mezüng yangluba train ya 1,200-kilowatt hydrogen fuel-cell propulsion system ajanga tashi agütsür.

Ghonda ka nung kilometer 75 tashi kera senzüba train nung ya passenger 2,600 tashi mentettsü aser yimti ana tsüngda anaben senzütsü.

Ato kilonserisa Haryana nung sen crore 14,700 jenjang terelok project aika tenzüktsüogo.



Regional Office, Jorhat, Crystal Enclave, Seuni Ali,
Borpool, A T Road, Jorhat- 785001 (Assam)

ADVERTISEMENT

Bank of Baroda-i Longleng, Dist: Longleng, Nagaland nung Branch tasen amenoktsü, ATM Premise, Solar Panel aser power densema facilities ajak atema ali tasazük 1000 - 1330 sq.ft, shi nüngdaka, talisa Ground Floor aginüa kiburtem aser kibur atema inyaksürtem dang nungi offers meshir. Premises ji ita ana tsüngda atsüngtsü atema renemtsü mesüra renema alitsüa akok. Offers agütsütsü tebilemba alirtemi offers ji sealed cover temeja ana nung Technical bid aser Price bid ta zülur Assistant General Manager, Bank of Baroda, Jorhat Region, Crystal Enclave, Seuni Ali, Barpool, Jorhat- 785001 nem 08.08.2026 anogo tashi nung mesüra iba anogo matongdang agütsütsüla. Public Sector Units /Govt. Departments nem tama maongka agütsütsü. (Osang tejangja atema onok indang web site www.bankofbaroda.com nung tender section nung reprangang). Kuli kecha magütsüi offers agizüktsü mesüra magizüktsü atema bank dak temeden lir.

Date: 18.07.2026
Place: Jorhat

Sd/- Assistant General Manager
Jorhat Region



Regional Office, Jorhat, Crystal Enclave, Seuni Ali,
Borpool, A T Road, Jorhat- 785001 (Assam)

ADVERTISEMENT

Bank of Baroda-i Tuensang, Dist: Tuensang, Nagaland nung Branch tasen amenoktsü, ATM Premise, Solar Panel aser power densema facilities ajak atema ali tasazük 1200 - 1530 sq. ft shi nüngdaka, talisa Ground Floor aginüa kiburtem aser kibur atema inyaksürtem dang nungi offers meshir. Premises ji ita ana tsüngda atsüngtsü atema renemtsü mesüra renema alitsüa akok. Offers agütsütsü tebilemba alirtemi offers ji sealed cover temeja ana nung Technical bid aser Price bid ta zülur Assistant General Manager, Bank of Baroda, Jorhat Region, Crystal Enclave, Seuni Ali, Barpool, Jorhat- 785001 nem 08.08.2026 anogo tashi nung mesüra iba anogo matongdang agütsütsüla. Public Sector Units /Govt. Departments nem tama maongka agütsütsü. (Osang tejangja atema onok indang web site www.bankofbaroda.com nung tender section nung reprangang). Kuli kecha magütsüi offers agizüktsü mesüra magizüktsü atema bank dak temeden lir.

Date: 18.07.2026
Place: Jorhat

Sd/- Assistant General Manager
Jorhat Region



Regional Office, Jorhat, Crystal Enclave, Seuni Ali,
Borpool, A T Road, Jorhat-785001 (Assam)

ADVERTISEMENT

Bank of Baroda-i Phek, Dist: Phek, Nagaland nung Branch tasen amenoktsü, ATM Premise, Solar Panel aser power densema facilities ajak atema ali tasazük 1200 - 1530 sq. ft. shi nüngdaka, talisa Ground Floor aginüa kiburtem aser kibur atema inyaksürtem dang nungi offers meshir. Premises ji ita ana tsüngda atsüngtsü atema renemtsü mesüra renema alitsüa akok. Offers agütsütsü tebilemba alirtemi offers ji sealed cover temeja ana nung Technical bid aser Price bid ta zülur Assistant General Manager, Bank of Baroda, Jorhat Region, Crystal Enclave, Seuni Ali, Barpool, Jorhat- 785001 nem 08.08.2026 anogo tashi nung mesüra iba anogo matongdang agütsütsüla. Public Sector Units /Govt. Departments nem tama maongka agütsütsü. (Osang tejangja atema onok indang web site www.bankofbaroda.com nung tender section nung reprangang). Kuli kecha magütsüi offers agizüktsü mesüra magizüktsü atema bank dak temeden lir.

Date: 18.07.2026
Place: Jorhat

Sd/- Assistant General Manager
Jorhat Region



TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI 18, 2026

Gadkari to kodang arutsüar na ?

Nagaland Chief minister Neiphiu Rio den pa medanger Deputy Chief mnister ana, T.R.Zeliang aser Y.Patton, par asemprongla oagi Delhi nung Union minister, Road Transport & Highways, Nitin Gadkari ajuruba noksa angudang aser osang angashidang, taoba ita June 15 nü Shillong nung Meghalaya government-i ayongzükbä North East Infrastructure Summit & Exhibition sentong nung jembidang, Union minister Gadkari jagi Nagaland Chief minister lia, pa anogo 15 tsüngda Nagaland-i arutsü aser pai aginübaji agütsütsü ta yimjak nung sangdongba o jet ta temulungi arua bilemogo. Anogo azüngtsübo, Gadkari-i pa Nagaland-i arutsü ta ashiba sülen tanü agi anogo 33 ajunger, saka pai nangzükbä ama pa arutsü melen Nagaland ajunga orr ajuruteper ama, Chief minister den Deputy chief minister anaprongla oagi ajurutsüsa adokbaji, ashiko parnokbo tebilemba tonga jembir asütsüa akok, saka tereprangtsübo tezüdangtsüka aser mazümazür repranger. Aji oda, arung ta mashiyonga Union minister kaji India telungjem (Union) nung aliba state shia oagi pa ministry kübok inyakba mapatem reprangdanga anepalutsübaji pa mapa asütsüla. Ibaji atema pa dang minister, tetezü anepalur, ta ajar. Ajisüaka, peisasa state ka chief minister lia alimai angashia 'ni anogo 15 tsüngda arutsü aser idangji terenlok mapatem inyaksü sentong metetdaksütsü aser tebilemtsütem reprangtsütsü," ta metetdaksür külena marubaji Nagaland mezügmeshir asütsü. Ajibo, Nagaland nem terenlok mapa senjang ka jenjang magütsüba dang nungi tamajungba aser Naga nunger mezügmeshiba mapa ka lir. Atangji, kechisüdirsüka Nagaland-i arutsübaji Gadkari Nagaland dang sentsü tsüa malitsüa akok, anungji kechiba Nagaland-i maru ta kuli meshia asüngdangtsübaji madoker, kechiyong arutsü ta nangzüker marutetba kulijibo aika alitsü aser mashiyonga temetet dang. Aji oda, iba onük nung ya kechiba Gadkari Nagaland-i arutsü nangzüker maru ta masü saka kechiba Nagaland ajunga orr Delhi nung Gadkari bushia ajutsüsa akümer ta asübajang tongtibangba asütsü. Ibaji kodang asenoki jungjunga bilemdangdir, Nagaland medeni Gadkari-bo ayongayonga litettsü saka Gadkari medenibo Nagaland lia aotsü tasak asütsü amai sayur. Atangji, tarutsü Nagaland jungdi süra, iba tensa tiaji meyipteptsüla aser Gadkariji dang masü saka oagi Delhi nungi yimsüsürtemji mejaokyonga Nagaland-i arunütsüsa asenok yimsüsürtema aser nübortema alitsüla. Ajisüaka, tang tangbo Nagaland asoshi oagi Gakkari ajubaji anüng petinu atonga ama bilemtsüsaba tia ka nung asenok lir, kechiyong asenoki Delhi nung prime minister Narendra Modi ajurutsübo makoker. Iba jagi joko mapang talangka Nagaland nungi aortem Narendra Modi den külemi agiba noksa mangur. Aji oda, asenok asoshi tebilemtsü kaji, Gadkari-i asenok dak temulung melemtetra, kodaser Nagaland nunga Meghalaya nung ama gari lenmangtem tuluba aser tajungba küma yanglua aotsü asoshi senotsü lemozütsütsü ? Kechi kodaser, pai Nagaland Foot Hill Road ya National Highway kümtsütsü ? Kechi kodaser pai Nagaland Foot Hill Road ya Trans Nagaland Highway kümtsütsü asoshi senotsü lemozütsütsü ? Aji otsü maka ! Meghalaya nungbo taoba ita Gadkari-i sen crore meyirijang tenem indang gari lenmang balala yanglutsü asoshi sentong tasen ka sangoktsüogo. Aji oda, Northeast state-tem rongnung asenokia tenük agi ngua kanga junga renloka aobaji Assam aser Meghalaya na asütsü. Ibaji BJP government asüba agi masü saka item state-tem nungji chief minister-i anir yimsüsür aser ketdangsertemji pei senpong aser kibong dang nungibo pei lima aser nübortem temeimba meimba nisungtem lir. Kasaji, item state-tem nung aliba nübortemi ochi meimer, meranga inyaker aser indangindanga alitsü meranger aser mapa ajak nendaknendaka inyaker. Asenokbo , ashiko, Gadkari jagi lenmang ka yanglutsü sen crore noklang ka agütsü nunga, shitakba lenmang inyaksüsbajibo sen crore ter metsü ka dang anüngtsü südi. Kasaji, Gadkari-ia Nagaland nung yimsüsürtem den jembidang pa mulung nung yamajika menünüa bilema alitsüa akok. Iba jagi asenok alur, iba jagi tangar Nagaland-i marunübajibo yujang, oagi Delhi nunga majureptepner.

OLEMSABANG

Tanü angati anguba kecha mali

Lanu Atsongchanger

Tanü alima kanga karaa ainba tensa ka nung asenok alidang takum libaliru temaba jenjangi atur. Tsürabur nungi angazükba agi, par putu alima tazü aser tongmelang liasü. Aji asünung alu ayimtsüji dang par shisatsü agi aru nung "shiri alu tuluba ayimer mesüra tsük teimba arur" ta asentsü sena akialu mapa nung takum arishi temdaksü. Par mapang, taka-taiter aser sensaker, makar ta tebandang ajiteta liasü. Aji oda, sensakertem pei tepok aser kibong mesütsü lenmang kanga satemrabo maliasü. Ozü tsüraburi senbo toktsür, jang, metsü-mersü tashi kiyonger-kidanger dang apudena onok mesütetba temulung ayanga bilemteter. Kümtem süitema arudang, alima ainba anogoshi meteter. Asen Naga lima nungbo Kohima aser Dimapur-ji kanga takar lima ta jembia aru saka asen Mokochung-a joko nüburtem kechisarena nung pi bendang menepa atuba angur aser iba jaki ashir, alima ainer.

Asen tsürabur mapang mangsa tia liasü, yongji temang anebaluba nung, sobusolemtsü nung, achi-ajemba nung aser takum libaliru ajak nung rongsenketzüng (economic life) tsütsülen kangarabo tejakleni moi "tanü poksüng" nung dang rangloker liasü. Saka tanü ibaji khenyongi melenshiatokogo. 1990's tema nungi shir asortemi alima manger mesangwa dang melenshia ainba ya kangarabo memetettsü südi saka iba jakdang asor shia alima ainba indangji kuli sütettsü. School-i aodang, tanü ama taxi/bus nung amentsüjibo toktsür anogoshia school kaket Kg 5-6 bener Km 4-5 tetsüng agi anogoshi naya metsü (20 paise) sa bener, oli aruli ta senzüba menungra-a bilemteter. Item anogotemji tanü anogo den asadanga tetsüngta tulu agi tongdanga lir.

Tsürabur mapang aluyimer timba liasüji, rongsen meintoki pei teka agi züsentetba agi kibong mesüa aru saka tanübo aluyimer 20-30% dang aküm nung nüburtem market nung dang metaloker alitsü tensa kumogo, aser market jenjang kechi nung lir asenok ajaki meteta lir. Asen taküm nung angati ajak agi o ya dang liasü saka tanübo iba o tashi alizüker ang jembir. (Mobile/ TV/Phone). Tetsüng agi dang senzüa liasü saka kima ayazükli nungi gari nung amener (totzü / para). Kidang TV angati (Dordashan) repranga liasü saka tanübo cable mesüra satellite TV repranger (koba nung ita shia cable fee agütsür/recharge asür). Angati anguba osettem - azü, süra, aser jara ta yong mechir ki yanglua litep, saka tanübo kojai (nail), merang, lisem, lung item amala sen agi alia ki sür alir. Arem nungi süng bena atsük saka tanü LPG (gas) amshir, mi nung tzü molua ajem saka tanübo light (power) ajanga molur mesüra filter sür ajemer (Bio-pure/aqua guard/mineral water etc.). Iba dak alaka ano aika lir.

Iba ama angati anguba kechia maliba putu ka nung asenok alidang asen tsürabur sobaliba tajung aser awashi nung alitsü kanga tongtibang ta tanü ni yangi shinür. Market nung asen nüngdakba tuluba nungi tilaba tashi angur. Asenoki zübazüba dang tenyatenko asür mesüra meshimetsür, saka iba nungji nai shiba tenyar/shiba dang meshir, pa/la bo teintokba (expenditure) dena lir ta metetang. (Tat. Mobile nung jembir, taxi/gari nung or arur/oset alioka aliba agütsür ano aika). Iba nung ya asenok tebilemdangtsü ka lir ta nibo bilemer, aser ibaji "asen sobaliba tajung awashi" ya lir. Iba awashi ta asüba nung ya tapu aika dang sentaka lir. Tanü iba "awashiba" yimya ya nisung ka taküm nung kanga tongtibang kümogo. Awashi maliba takümbo, na komala ka ka-a itaa aser shia meteta liaka, nüburtemi naji jangratema majitsü. Hau! alima nung shinga tabensaba mali saka kati ka den angazüktepa aor. Anungji, asenok ajaki tabensabaji arishia aotsü merangtsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Anglicans-i Arogo million 1 tenzüksütsü mangdang ayur



Belfast nung 19buba Anglican Consultative Council nung Church of the Province of Central Africa nungi Canon Robert Sihubwa-i jembidang tangokba noksa nung angur.

July 17, 2026: Anglican lenirtemi taruba küm 10 tsüngda Arogo million 1 tenzüksütsü mesüra asentenshitsütsü atema mangdang ayuba lemsatepogo. 'Vision36' ta ajaba mangdang ya tawa Belfast nung 19buba Anglican Consultative Council aliba mapang nung Anglican Communion Commission for Evangelism & Discipleship-i metetdakja liasü.

Iba mangdang kübok Anglican province, diocese aser Arogo ajak dang 2026 küm nungi 2036 küm tsüngda Arogo tasen tenzüksütsüba mesüra tanaben asentenshitsüba nung shilem agitsü tayongzükbaga agütsü.

Church of the Province of Central Africa nungi Canon Robert Sihubwa-i, iba mangdang ya tesem ajaklen Arogotemi nüburtem lenji aotsü atema lir, ta metetdaksü.

"Iba mangdang ya alima nem Arogo agütsütsü atema lir aser akokba tashi nüburtem den tesendaktep yanglutsü atema lir. Iba ya ajanga anasatiba Anglican Arogo bushia aotsü atema aikati lenmang talang mejajatsü," ta Sihubwa-i Anglican Consultative Council nung züngsemtem nem metetdaksü.

Sihubwa-isa Arogo mission atema tasü aittsüla, ta ayongzükbaga agütsütsü atema Anglican ket nung langka lir. Alima den osang ka lemsateptsü atema asenok ket nung osang ka lir. Asenoki alima nem langka tagütsütsü lir. Taruba küm ter tsüngda Arogo million 1 tenzüksütsüba mesüra asentenshitsüba ajanga asenoki ibaji inyaktettsü," ta pai ashi.

Vision36 kübok Arogo tasen tenzüksütsüba dang masü saka tesülen atsüngzüka aliba Arogotem-a asentenshitsütsü.

Iba mangdang ya JC2033 den-a sendaktepa lir. Yisu Khrista tasü nungi shia aruba sülen küm 2,000 ajungba küm

(2033) alizüng ya alima nung Arogotem asentenshitsü aser Khrista osangtajung sangdongtsü atema Arogotem atema maongka tajung ka asütsü, ta Anglican lenirtemi metetdaksü.

'Vision36' ya alima tesem ajaklen atema mapatong ka lir, aser iba mapatong takok anguba nung Africa-i tongti shilem agitsü imlar.

Anglican züngsem teimtiba aliba continent ji Africa lir.

2025 küm Pew Research Center ajanga ashiba agi, alima nung Khristan nütsüng shilem 30.7 bo sub-Saharan Africa nung lir.

Vision36 mangdang benoksang Canon Robert Sihubwa ya Church of the Province of Central Africa nungi lir. Council nung o lemtepbaga mapang nung Kenya aser South Sudan nungi lenirtemi par linüktem nung Arogo tasen tenzüksütsüba aser nütsüngsüba tsütsü wadang tulu inyakba tatishitsü lemsatepa liasü.

Kenya nungi Arogo lenir kati, Arogo tasen tenzüksütsü atema Arogoi lapokba school tem ajanga maongka agütsür, ta ashi.

Episcopal Church of South Sudan nungi Bishop Joseph Bilal-ia, province tesem ajaklen sarasadem mapatong ka ajanga Arogo aika renlokogo, ta ashi.

Africa nung Arogo kanga renloker aser Europe nung Arogotem tesüleni atsüngzüka aoba mapang ka nung Vision36 mangdang ya benoker.

Pew Research Center-i ashiba agi, mapang ka nungbo alima nung Khristan nütsüng teimbaji Europe nung liasü saka tangbo Khristan nütsüng teimbaji Africa nung lir.

Joko tangbo Khristan organization aikati, Arogo tasen tenzüksütsüba, mission mapaga inyakba, Khrista osangtajung prokba aser nütsüngsüba nung lenirtemji African Arogotem lir ta

bilemer.

Church of England nungi Rev. Eleanor Sanderson-i, Vision36 ya Anglican commissions ajanga lir, kechiyong parnoki Khrista osangtajung sangdongba aser nütsüngsüba naji pilatsü makok ta apiteta liasü, ta metetdaksü.

Taoba mapang Anglican Church of South America nung Archbishop Nick Drayson-ia, iba mapatong takok angutsü atema Anglican Communion-i tongtibang foundations yanglur alitsü, ta onoki amanger, ta metetdaksü.

Belfast nung ayongzükbaga 19buba Anglican Consultative Council nung linük 165 nungi Anglican Arogotem nung lenirtem aser putirtem aikati shilem agia liasü.

China nung 'Sinicization' policy kübok Khristantem timtemer

July 17, 2026: China Tir, Xi Jinping lenisüba kübok 'Sinicization' policy ajanga linük nung Khristantem anema inyakba kanga bulua akümer aser Khristantem atema tensa tamajungba dang akümer, ta ChinaAid-i metetdaksü.

Tang tesüsa June ita nung police-i Early Rain Covenant Arogo mita ao aser Arogo nung züngsem 30 dak tali apu.

2012 küm Xi Tir akümba sülen tang tashi nung China nung Khristan 10,000 dak tali puogo, ta July 12 nü osang ka ajanga metetdaksü.

Communist sorkari melaba Arogo nung madenba atema Khristantem aika pua reshikangshir, ta China nunger Khristan aser ChinaAid tentetsang, Bob Fu-i metetdaksü.

ChinaAid telok yagi China nung reshikangshi ajangshiba Khristantem yarir.

Bob Fu-i, China nung ketdangsertemi independent Arogotem (underground churches) anema inyakba ya Chinese Communist Party's (CCP) taküm alitsü aser Tir Xi anema amokmeren ajak

ANOGO ABEN TSÜNGREM DEN

Tesendaktep Khristan Shia Anepalur Kaka Lir - Efesa 4:29-32

Medemer o medemer na khu bentepang, aser aji oda Khrista ozüng atalokjang. Galatia 6:2.

"Ne mapaga nung temulung agüjang". Lauren o masü. "Kati ka khu bentepang. Nenok shisa buluba ajak Pa dak yuang, kechiaser Pai nenok asoshi anepalur" (1 Peter 5:7). Asenok anepalur Tsüngrem lir. Asenok kümzüksü asoshi Pa chir yoktsü Pai anepalur. Pai anepaluba ashitsü Pa Tanelai asenok ajungmesor. Asenoki Pa ama kümnera kati ka asoshi anepalutsüteptsüla.

Tsüngremi asenok arogo - tamang telok ka nung yutsü - idangji kotak leman nung noktaksü asenok kati ka dang yaritettsü. Akhidang arogo nem agütsüba ozüng tanüa amshir: "Adianutem, nisung ka langka tai nung pura, nenok Tanela akartemi pei indang bilemdanga, peisasa tatitang ngua lir ta, tanela ajemaluba nung iba nisung meyipdakjang" (Galatia 6:1).

"Ibai kü mapaga masü" kodang ochi masü. Tangari kechi inyaker iba jagi asenok dak kechi inyaker aser asenoki kechi inyaker iba jagi tangar dak kechi inyaker. Tangar ajangzüksü asoshi asenoki Yisu tenüng nung jembitsüla aser inyaksüla. Ibaji asenok mapaga asütsü Tsüngremi yanglu.

Tangar Khristantem temeim asenoki nüngdaker aser tangar Khristantemi asenok temeim nüngdaker: "Ajak dak alia, kati ka dang junga meimteptsü kechiaser temeimi temenentem nembanger" (1 Peter 4:8). Tsüngremi tuyur.

Temeimba Kibur, kotaker Obala, tajuruteper ajak dang Khrista temeim indang ashitsü ni asoshi mapang tajung südakjang.

nokdangtsü atema lir, ta ashi. nungji madenba Khristantembo ozüng alema inyakertem lir ta züngshia temerenshi agütsür.

"Iba ya Chuba kati Tsüngrem ama inyaksangshiba lir. Pai [Mr Xi] pagaga khenyongi balaka süner. Pai pagaga dak temabaga ka (Tsüngrem) lir ta mezüngshidaktsüner mesüra pagaga dang nungi temabaga ka mekülemdaktsüner," ta Fu-i ashi.

Khristantemi ashiba agi, ayaterm mapang nunga police arua ki mita repranger aser asüngdangyar, aser karbo hopta aika pua ayur.

Khristantem dang masü saka lawyer tem-a iba nungjagi jenbua mali. 2017 nungi tenzüka 2023 küm tashi nung meimchir temeden atema inyaker lawyer 30 indang licenses agientsüogo, ta Ireland nung amenoka aliba meimchir temeden atema inyakba telok Frontline Defenders-i metetdaksü.

China nung Regulation on Religious Affairs-i Khristan yimsü amangertem ajakji sorkari melaba Chinese Catholic Patriotic Association mesüra Protestant Three-Self Patriotic Movement nung züngsem akümtsüla, ta tuyur. Telok ana

Tang China nung sorkari melaba Arogotem nung züngsem million 44 shi lir aser underground Arogotem nung züngsem Khristan million 115 shi lir.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Yongrak

(adv) yong agi alenba (tie or fasten with bamboo cord)

* Kisüjensü mapa nung yongrak akangkanga alentsüla.

Yongrü

(adv) yong nung tur ayuba (skewered on bamboo splints)

* Ozü kidang nashi tar yongrü anasemka nung tudaka ayu.

OLONG PAITEP # 7569

	1	2							3	
4										
5								6		
7								8		
9	10				11			12		13
14				15						
	16									

TIPIEN

1. Ajem-ajemer - (9)
5. Kanga tapet - (7)
6. Tsüngküm ozü ka - (3)
7. Tzünglu tongdangba - (6)
8. Anüing nungi tsükba - (3)
9. Anüing nung yimzüba - (3)
11. Lenmang süitepdak - (6)
14. Anüingdang tesangwa - (3)
15. Shisatsü tamajung - (7)
16. Tiyazü jembia tangar ashiochtsüba - (9)

LANGTSÜNGLEN

2. An-i akoba - (5)
3. Aonsotsü tashi ka - (5)
4. Temolungjang nung miima meyu-i ashi - (4)
10. Kunemkushi / Jakla ait - (5)
12. Nisunger yimya / inyaksangshi - (5)
13. Mali - (4)

OLONG PAITEP # 7568 TELANGZÜBA

TIPIEN:

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN:

1. Alimang, 2. Pongen, 3. Samaru,
4. Nün, 6. Pio, 9. Nüingdak,
10. Yongya, 11. Kongro, 13. Ora,
14. Ata.

NAI-A YA METETTER MA



July 12, 2026 nü Ahmedabad Municipal Corporation (AMC) ajanga Guinness World Record ka yangluogo aser iba ya Miyawaki method amshia parnoki ghonda ka nung 63.61 lakh saplings atemba atema lir.

Ahmedabad tezülen aliba Bhadaaj nung volunteers 25,000 tema adenshia iba sentong nung shilem agia yaritep.

Actor Randeep Hooda-i Manipur CM den ajurutep



Imphal, July 17, 2026

(Agencies): Bollywood actor Randeep Hooda-i Imphal nung Manipur Chief Minister Y. Khemchand Singh den ajurutepdang nübortem dang yijung aser putepa alitsü tayongzükba agütsüogo.

Hooda den pa kinungtsü Manipuri actor Linthoingambi Laishram nati CM Khemchand den ajurutep. Idangji tenati Manipur tensa indang jembiba den tensa süngjemtsü atema tebilembatem lemsatep.

Manipur nung law & order tensa tamajung ka ajurua alidak chief minister inyakba atema Hooda-i Khemchand Singh nem tenüngsang agütsü.

Iba tebilemstü khuret tulu saka kobi melii yimjung angutsü aser tensa süngjemtsü tamang akar ta CM Khemchand-i ashi.

Paisa tawa Jiribam district semdangba aser kin balala rongnung tamang kateptsü atema meranga inyakba osang lemsatep.

Nübortem tsüingda temulung lemtepdang aser parnok süngjema lidar ta CM Khemchand-isa ashi.

Sorkari sensotem taküm kümzüka ayutsü tenangzükba yur inyaker aser akokba tashi timtem ajururtem yaritsü meranger ta paisa shisem.

Iba senden amenba sülen Rath Yatra (Kang) benjung nung shilem ka ama CM Khemchand-i Hooda aser Laishram na den khechri lemsatepa liasü.

Assam aser West Bengal police-i tetsür 3 kümzük

Guwahati, July 17, 2026

(Agencies): Assam nungi tanur ka dena tetsür asem nem mapa agütsütsü ta ser West Bengal-i anir orr teküp yokdaksüba nungi kümzükogo.

Assam aser West Bengal police joint operation ka nung parnok kümzük.

"Tetsür asem rongnung ka

Sonitpur district nungi aser tanüingba anaji temeket district tem nungi lir" ta Sonitpur Senior Superintendent of Police Barun Purkayastha-i ashi.

Parnok dang mapa agütsütsü ta tiyazü shia West Bengal kübok Siliguri-i anir ao aser idakji teküp yokdaksü ta SP Purkayastha-i ashi.

Assam Police aser West Bengal Police külemi parnok kümzüktsü asoshi mapa inyak aser par asemprong Assam-i anir aruogo ta Purkayastha-isa shisem.

Iba dak sendakba nung Police-i FIR ka benokogo aser nisung shibelenertem maitsü jangjatsü atema bushisüingdang ka tenzükogo.

Tirap district nung NSCN-R züingsem ka temai adok

Itanagar, July 17, 2026

(Agencies): Arunachal Pradesh kübok Tirap district nung NSCN-R züingsem ka security forces tsüingdang temai adokogo.

Iba nisung ya Lieutenant Colonel Penngam Konyak (42) ta jangjaogo aser pai Khonsa nung Superintendent of Police

office nung temai adok. Iba mapang Arunachal Pradesh Police, Assam Rifles aser Central Reserve Police Force (CRPF) liasü.

Penngam Konyak ya Nagaland kübok Mon district nung Nyasa nung aser pai pistol aser injang agütsü.

"Administration aser security


agencies-i telungpur khuret agentsü atema külemi yaritepa aruba ajanga telungpurtem temai adoker" ta police ketdangsür kati ashi.

Tirap district ya Nagaland den arrtsüa lir aser mapang talangka iba tesem nung telungpur maparen kanga bulua inyaka arur.



CLP Leader K. Meghachandra Singh-i anir Manipur Congress teshimtet telok kati Leimakhong Chingmang nung Kanto Sabal Leikai semdangogo. July 11, 2026 nü iba tesem nung ki kar rongdokja liasü aser Congress lennirtemi iba tesem nung alirtem aser pei talidak toktsür aoba kibongtem den ajurutepa sensaksema liasü. Iba tesem nung yimjung aser tensa süngjemba den takoksa ajurua aliba kibongtem mapang shitak nung yaritsü atema Congress lennirtemi ayongzükogo.

Uganda nung school bus ka tsükok, tanur 20 shi asü



Chekwatit, Chiteni/July 17 (Agencies):

Uganda anüdoklen bus ka nung kaketshirtem mener study trip aodang tsükoka kaketshir 20 aser nisung tain ka asü, ta iba lendong atalokba tesem nung ketdangsür temi ashir, koba linük nung tanurtem densema gari lendong tesashitiba rongnung ka alitsü.

Brehostibar nikongdang Kapchorwa district nung iba lendong atalokba mapang staff tem densema nisung aika yiru.

Bus nung 'mechanical fault' asü aser Chekwatit Hill nung iba gari anisangi gari maziükteti akum ta ashir, kong iba ama lendong aiben ataloka lir.

Iba lendong ajuruba mechi bushisüngdang matem tashi school educational trips ajunga

thiogo, ta sorkar meyong osang ajanga ashir.

"Asen tanurtem kumzüka ayutsü mechi asenoki langka inyaktsüla," ta Education Minister John Chrysostom Muyingo-i New Vision news site dang ashir.

"Driver-i gari ya maziükteti akum, koba lenmang tezüleni longzüka ao aser lenmang tezülen long tuluka nung oa tsüker makep," ta police-i ashir.

Iba bus nungya Ndeje nung aliba King David Junior School nung-i kaketshirtem mena liasü aser Chekwatit yimtsüng nung nikongdang 8:00 ako (par mapang) meta tsükok.

"Tesasatsüka tanur 20 aser founder aser director Tadeo Ssekade Kibuba den alitsü ogo," ta Local Government Minister

Balaam Ateenyi Barugahara ajanga X nung ashi.

Tenük kuli alirtemi video tem lemsatepba nung bus ya kanga mejungi raksar alidaki yangji alirtem yirur aliba tanur yaritsü arsangtepa oa liasü.

Kaketshirtem ya study tour nung Sipi Falls semdanger meyipa shilangerba liasü, ta ashir.

Uganda nung küm shia lenmang nung iba ama lendong ajurua nisung meyrirjang aika asür, kong gari kanga kera amshir, gari tem junga anepalu masür aser lenmang majungba ajanga iba ama lendong ataloker.

Tawa linük nung bus aika tsükokba sülen school transport asoshi tebilemtsü akaba mapang iba lendong ya ajurur alitsü.

US-i Iran nung apu tem amak, rongnendak tower ka laodaktsü

Dubai, Chiteni/July 17 (Agencies): United States-i Iran nung amakba Hokulbarnep ulushia apu aser energy sites nung kongshiogo aser tongtipang Iran nunger rongnendak tower ka laodaktsü, koba Tehran-i Strait of Hormuz shibanga aliba lapokdaktsütsü atema US Tir Donald Trump-i ki o jen amak

tenzüksü amokmerenba nung shilem ka alitsü.

Iran-ia Middle East nung iba rara asoshi tongtipang odongtar Qatar densema US den sendaktepa aliba linüktem nung missile agi amak. Parnoki Kuwait nunga power aser water desalination plant ka raksatsü, koba lisem lima tila asoshi kanga tongtipang lir.

Taoba hopta züngzüktepba interim ceasefire raksaogo, aser region nung anogo ishika US aser Iran tsüngta tayang kepzüktepa maktepa arur aser strait aziüoktsü meranger. US-i amakba mapang nisung aika tepsetogo aser ano noklang aika yirutsüogo ta Iran ketdangsürtemi ashir aser Hokulbarnep amakba nunga nisung asü-amaba lir.

US aser Israel nati February 28 nü Iran den rara tenzükdang Tehran-i iba strait nung rong mesenzüdaktsüi nokdang,

anungji alima nung totzü jenjang timba akum aser yimjung ken o jembishinü nung Iran asoshi kuli tajung ka ngutet.

America nunger den jembidang, rara junga otar, ta Trump-i nenshia ashir.

"Iba amaji asenoki Iran nung takok tulu angur, aser kanga yakta nenoki item süngjang angutsü," ta Trump-i ashir.

US-i tayimtsü amshia Hokulbarnep amakdang Iran south tsütsü Hormozgan province nung apu tem raksatsü aser nisung tenet tepset, ta Iranian state television ajanga ashir. Iba mapang Strait of Hormuz tzükum nung Iran indang Bandar Khamir yimti nung amak.

Highway aser railway apu tem nung amakba ya Iran indang rongnendak tulutiba, Bandar Abbas ya Islamic Republic indang yimtiba Tehran tsütsü region leni aoba lenmangtem raksatsütsü nükjidong nung inyakba ama ajiteter.

Tanga lenmangtem lapoka lir, ajisüaka US-i ano tesem tuluba nung amaktsü akok, anungji mitkar indang oset aser Iran nung nisung million 90-i nüngdakba oset tem abenba tesemtem nung timtem ajurutsü.

Hokulbarnep US-i tayimtsü amshia amakdang power

infrastructure nung kongshiba indanga Iran-i agizükogo aser Energy Ministry-i southern provinces nung nüburtem dang power ajema amshitsü ayongzü.

Ajisüaka ministry-i iba ya power plants, transmission lines asü mesüra tanga oset nung kongshibar rasaa mashi.

Anogo ishika power infrastructure nung amakba temulung melemtemi lia arua liasü. Mongulbarnep osangbener temi Tehran city councilman Mehdi Chamran dang electrical tebilemtsü indang asüngdang dang, "Power facilities kwi nung kongshia aliar reprangdangang... aser nai ibaji masüngdangtsü," ta langzüa liasü.

US mitkar indang Central Command ajanga ashiba agi, tang tesüsa tayimtsü amshia amakdang targets ter dak tema nung kongshiogo, koba Hokulbarnep tembang.

Iba mapang Gulf of Oman nung Iran indang Chabahar rongnendak tower ka lao, koba ali agi meketbanger aliba kidanger Afghanistan asoshi shishilempaba lenmang tongtipang ka lir, ta sorkar meyong IRNA news agency ajanga ashir.

(Maneni tapak 8 nung...)



Office of the
Longsa Kaketshir Telongjem

H.Q: Longsa Village
Dist. Mokokchung-798601, Nagaland

TENÜNGSANG AGÜTSÜR

Longsa Kaketshir Telongjem ajanga kaketshir shirnokisa tatidang balalatem nung takok tulu nguogo, nenok ajak nem tenüngsang tulu agütsür. Aser maneni alakteta züngsem kwikati tematiba jenjang nguteta khonang nüngsang tulu bener arutsüogo, takoker nem tepela tenüngsang yimiyim sangoktsür.

- Miss. Sentongjungla B Jamir**, D/o Mr. & Mrs. Bendangtoshi, from Jubilee Memorial College Mokokchung, for securing Top 3 in Economics, Undergraduate (FYUGP) Examination 2026.
- Mr. Tsuktisosang**, S/o Mr. & Mrs. Tiameren, from Fazl Ali College Mokokchung, Top 7 in Sociology, Undergraduate (FYUGP) Examination 2026.
- Miss. Imkongtula Jamir**, D/o Late. Mr. & Mrs. Bendangkoka Jamir, from Fazl Ali College Mokokchung, for securing Top 4 in Zoology, Undergraduate (FYUGP) Examination 2026.
- Miss. Temjenmenla Pongen**, D/o Mr. & Mrs. Tongpangkoka Pongen, from Fazl Ali College Mokokchung, Top 1 in Ao, Undergraduate (FYUGP) Examination 2026.
- Miss Sahnemren N Jamir**, D/o Late. Mr. & Mrs. J. Nungsangtemjen Jamir, from Tetso College Dimapur, Top 5 in Political Science Undergraduate (FYUGP) Examination 2026.

Sd/-
Temjenmeren
Tir, LKT

Sd/-
Bendangsenla
Tongti Zülur, LKT

2020 election nung China-i teka sangshi: Trump

Washington, Chiteni/July 17 (Agencies): US Tir Donald Trump-i nüburtem den television ajanga jembidang 2020 election nung China teka sangshi ta tai tongloksü aser American voting systems taoksatsüla timtem ajurutsü kumbang nung lir ta ashir.

Trump-i Brehostibarnü White House nungi jembidang, 2020 election nung vote auyaba aser bendangeri teka amoshiba indang aiben jembia liasü, kong Joe Biden-i pa akok.

Midterm elections agitsü ita ishika lia pai ghonda tesadang ka jembidang, Biden bhukuma election agitsüsa Beijing-i teka sangshi ta pai jembiba bhukumtsü intelligence files noklang aika temai adoktsüogo ta ashir.

Ajisüaka US itdangiter temi taoba mapanga 2020 election nung China-i shilem magi ta bushiteta lir.

Pai jembiba langzüa China indang foreign ministry-i 2020 tir election nung China teka amosshi ta jembiba ya khenyongi tiazü lir ta ashir.

Trump-i jembiba ya tiazü agi sünga lir, koba tamendak dak maka ta tamale nungi kuli nguteta lir, ta foreign ministry odongtar Lin Jian-i ashir.

Trump-i par team nungi ketdangsür ishika jakdang iba o ya jembiba, saka osangbener temi tir dang kecha masüngdangtet.

China-i jurila osangtem densema tim masüba yimya nung 220 million voter files agitet ta pai tai tongloksü.

States 18 nung voter data ya China-i alizük, auya mesüra hack asü aser sorkar ketdangsür mesüra Congress nem iba inyakyim ngutetba osang magütsü, ta Trump-i ashir.

Voter data ya aika yimjak nung angur aser China-i voting systems melenshitsütsü mesüra election results melenshitsü asoshi amshiba indang kuli kecha Trump-i magütsü.

Kasa mapang Democrats

temi, November midterms agitsü lia Trump-i nüburtem mulungjang nung temulung melemtetba adokdaktsütsü meranger, ta ashir. Iba election yagi Trump tanüngba kümsük mapang Congress aziüoktsü asoshi telemtetba agitsü.

Trump-i iba o jembizükba sülen, "Ajaki ya meteta alitsüla - America nung voters temi pei lenir shimer, aser tanga lenmang nungi masü," ta Senate Democrat Chuck Schumer-i social media post ka nung ashir.

"Donald Trump nungi tetsükdaktsü mesüra teka sangshiba melidaktsüi America nunger voters ajungai pei vote agütsütsü asoshi Democrats-i raratsü," ta pai ashir.

Tir Trump-i jembiba ya taoba mapang US itdangiter temi asadangtetba den meputeper. 2021 küm US National Intelligence Council ajanga report ka nung ashiba agi, 2020 tir election nung China-i shilem magi ta amanger.

"US tir election melenshitsü tebilemba nung China-i teka amoshiba mali ta onoki asadangtet," ta report nung ashir.

Kechiaser yamaji inyakba ajanga China tajangzü angutsü südi ta parnoki majitet, ta shia liasü.


Trump-isa US voting machines ya Russia, China aser Iran densema bendanger tsükchir temi amshitetsüsa lir ta shia liasü.

Ano senso masüba nisung 278,000 vote agütsütsü tenüng zülüoka aliba Department of Homeland Security ajanga jangjatetogo, ta Trump-i ashir.

Pai tatemlen SAVE America Act agizüktsü asoshi ayongzüka liasü, koba ajanga mail voting timba nokdang, voter registration atema proof of citizenship meshir aser vote agütsütsü atema photo ID nüngdaker.

Iba ozüng ya ita aika Senate majangteti anendaka yua lir.

TangmezüngbubaFIFAWorldCupnungChampionsRingsagütsütsü



FIFA World Cup 2026 champion nem agütsütsüba ker.

Washington, Chiteni/July 17 (Agencies): FIFA World Cup 2026 final akoker nem trophy aser gold medals den külemi "bespoke championship rings" agütsütsü, koba FIFA-i iba tetushi tang mezüngbuba agütsür asütsü, ta FIFA indang website ajanga ashir.

Iba ker ya America nunger akhi mapang nungi saisapong yimya ajanga ajungmesoba lir, aser July 19 nü New York New Jersey Stadium nung Spain aser Argentina tsünga final asayba sülen asayamung akoker nem agütsütsü.

FIFA-i iba asayamung nüngtem nung 'individually numbered rings' 2,026 yanglutsü. Keri 30 ya takok

anguba telok nung züngsemtem atema alitsü aser tanünga 1,996 ya fans tem atema official licensed product ama alima tesem ajunga nung ayoktsü.

Keri shia külen FIFA World Cup trophy alitsü aser külen champion team maitsü inoktsütsü. Keri shia ya züngdangba balala alitsü, custom-fitted aser iba den kuli tejanga agütsüba kulizüng kakat alitsü.

Final tembangba sülen takok anguba team indang captain aser head coach nem iba temaitsü khen atema ker agütsütsü.

Champions atema ker 30 ya khen lir parnok nem magütsüdang ker ya nisungba

temeyong den apet yanglutsü.

Taoba asayamung takok marok bena aliba Argentina ya tesülen nungi menepa arua hopta tetenzüklen semifinal nung England madak 2-1 agi takok angu. Halftime tashi tesü süshia lir Enzo Fernandez ajanga kasa kumdahtsü aser asaya tembangtsü anasa Lautaro Martinez-i goal ka yokteta Spain den iba asayamung title asoshi asayatsü jenjang leptet.

Argentina asoshi goal agütsüba anaprong nung Lionel Messi-i assists süa liasü.

Iba tamakok ya 1966 sülen England-i FIFA World Cup final atongtsü teimla tembangba asaya liasü.

Spain ya 2010 küm iba asayamung takok marok ajungketba sülen tang mezüngbuba World Cup final tonga lir, shirnoki France madak 2-0 agi semifinal akok.

Iba asaya nung Lamine Yamal-i tongti shilem agia Lucas Digne-i aibelen penalty ka angu. Minute 22 buba nung Mikel Oyarzabal-i penalty ya aibelen mesüi metsüokja liasü.

Iba sülen ano Pedro Porro-i Spain asoshi goal tanabuba agütsütet, saka France nunger goal agütsütsüa maongka tajung meyanglutet.

Iba asaya nung Yamal-i goal ka yok, saka offside liasü aser tesülen Kylian Mbappe aser Aurelien Tchouameni nungeri kanga merangaka Spain indang defence kanga ajang ajanga nokdakteta asaya tembang.

France 0 Spain 2 England 1 Argentina 2	3rd place play-off France England July 19 ; 2:30 AM	FINAL Spain Argentina July 20 ; 12:30 AM	

Japan Open: PV Sindhu semifinals tongogo

Tokyo, Chiteni/July 17 (Agencies): Hokulbarnü Japan Open quarterfinal nungi Nozomi Okuhara ainshiba sülen India tsür PV Sindhu semifinals tongogo. Iba ya ajanga India tsür badminton asayar PV Sindhu ya tang season nung semifinal asemben buba asayatetsü, shiba Malaysian Super 1000 aser Australian Super 500 asayamung nunga semifinals tonga asaya liasü.

Ajidang masü ibai Sindhu asoshi 2023 Denmark Open sülen Super 750 semifinal nung tang mezüngbuba asayar asütsü.

Arishi küm 31 tain Sindhu ya tang season nung mezüng buba title ngutetsü nükjidong nung asayar aser lai semifinals nung China tsür Tokyo Olympic champion aser World No. 4 Chen Yufei den asayatsü. Tena career head-to-head record nung Sindhu-i trok ben aser Chen-i ti ben koka lir.

Tena tesüsa ponguben asayaba nung Chen-i Sindhu madak takok ngua lir, anungji iba züngdangba rakdangtsü asoshi Sindhu atema iba semifinal ya kanga tongtipang lir. Sindhu-i Chen ya akok nungbo, küm asemjungnüa nung lai Super 750 final tang mezüng atonger asütsü.

BWF Super 750 asayamung nung India nunger rongnungi

Sindhu kisüng tang tashi asayar lir. Taoba asaya nung anaben Olympic medal ngur alilai quarterfinals nung China tsür world No. 5 Han Yue madak minute 35 nung 21-16, 21-14 agi takok ngua liasü.

Arishi küm 28 tain Chen Yufei asoshi tang season ya kanga junga asaya arur, shibai Indonesia Masters akok aser Thailand aser Malaysia nung Super 500 finals tonga liasü.

Lai asayamung tulutem nunga tanen makai junga asaya arur, shibai Singapore aser India Super 750 asayamung den Malaysia Open aser All England Super 1000 tournaments nung semifinals tonga asaya.

India nunger category balala nung asayatem ajak iba asayamung nungi tsükogo. Tarep temeyoktep Dhruv Kapila aser Tanisha Crasto ya China nunger Feng Yan Zhe aser Huang Dong Ping nati pre-quarterfinals nung 20-22, 17-21 agi tsükdaktsü.

Tetsür kija asaya ka nung Unnati Hooda ya Chinese Taipei tsür Huang Yu-Hsun-i tsükdaktsü. Tebur tarep asayar ajak Mongulbarnü tsüka liasü.

Satwiksairaj Rankireddy aser Chirag Shetty, aser MR Arjun aser Hariharan Amsakarunan nunger iba asayamung nungi tsükogo, kong Satwik aser Chirag ya ano yirua lasü.

BENDANGLI OSANG :

Tapak 7 nungi...

US-i Iran nung apu tem amak, rongnendak...

Chabahr rongnendak tesem ya India teyari nung Iran-i lapoka liasü, aser America nungeri tayimtsü amshia aiben makogo. Iran state media-i iba tesem nung asemben buba amakba shiogo saka tower laoba indangbo mashi.

Iran-i iba tower ya rongnendak shishilempaba rong tem achayangba tesem ka lir ta ashi. Ajisüaka Iran indang paramilitary Revolutionary Guard-ia linük nung rongnendak tesemtem ya amshir.

Hokulbarne 6:00 ako tashinung US-i amakdang Iran nung nisung 38 tepset aser 400 dak tema yiru, ta Health Ministry odongtar Hossein Kermanpour-i ashi.

Hokulbarnü Qatar-i nüburtem dang tesem balala nung jenoktsü anaben ashi, kechiaser Iran nungi missiles khalokja liasü. Missiles raksatsütsü asoshi air defenses

khaloktsüba mapang nüburtemi anünglen ola tulu adoka apokba angashi. Qatar indang Interior Ministry ajanga missile teraksa tsükba ajanga tanur ka yiru ta ashi.

Iran rara tembangtsü asoshi tangatetep kati arutsü meranga jembishinüba nung Qatar aser Pakistan ya tongti shilem agiba linük lir. Ajisüaka Iran-i Strait of Hormuz alenbanga ayuba mechi jembishinü anenogo.

Iran-i Hokulbarne Bahrain aser Kuwait linük nunga amak. Kuwait nung Iran-i power aser water desalination plant ka nung amak aser station kanga sashia raksa, ta ketdangsür temi ashi. Iba linük nung tajemtsü tzü shilem 90 shi desalination nungi arur, anungji yaji timtem agütsüba ya nisung takum asoshi lendong lir.

Jordan mitkaria Iran-i khaloktsüba missiles asem Hokulbarne khazüka yok ta ashi.

Iraq north tsütsü

semiautonomous Kurdish region nung aliba Irbil aser Sulaymaniyah nunga Hokulbarne ola tulu adoka apokba angashiogp. Iba ya Iranian Kurdish anemer Komala telok dak tenük yokba ama ajitetet, kong nisung toku asü aser aika yiru, ta ketdangsür kati ashi.

Iran-i iba tesem amakba tenüng agia mali saka taoba mapang Komala nung amakba otsü lir.

Ano Hokulbarnü sa Strait of Hormuz nung Oman anasa tzü lenmang ka nung senzüba tanker ka dak amak, ta Bristis military ajanga ashi.

United Kingdom Maritime Trade Operations center nungi osang aruba nung rong ya tera raka aser yangji alir yiruba mali ta ashi.

Iran-i Oman anasa tzü lenmang nung senzüba tankers tem dak maka arur, saka tangbo parnoki yangji amakba sangdonga mali.

STATE OSANG :

Tapak 2 nungi...

Association of Nagaland Literature...

Ura Academy indang tatong tir Daso Paphino-i Academy tenüng nung salem o jembia aser Tenyidi oshi renlokba indang tongmelang agi rasaa ashi.

Kohima-i 1887 küm arusang American missionary Rev. Sydney W. Rivenburg-i oshi terenlok nung tongti shilem agia alphabet amshi tenzük aser itemji shisaliok nung amshitsü ajungmeso, ta pai ashi.

Tenyidie ya North-Eastern Hill University (NEHU)-i 1988 nung recognized asü aser Nagaland University nung 1997 nungi amshia arur, ta Paphino-i metetdaktü.

Tang department nungi postgraduates 330, PhD holders nisung toku, aser tang scholars 17 doctoral studies

agitar aser Nagaland nung colleges tenet nung Tenyidie oshi sayur, ta ashi.

Paisa ita shia adokba Ura Dze kakat küm 50 ajungba, tanga monthly magazines pezü aser anogoshi CAPI osangkaket adokba ajanga Tenyidie oshi ajungkettsüba indang lemsatapa liasü.

Iba senden nung ANLB tatong tir S. Akho Leyri menden liasü aser ANLB tongti zülur Chegeseng Kath-i melepzüng o jembia senden tembang.

Iba sülen business session nung züngsem temi ANLB Constitution agizüktsü, institute/academy amenoktsü, language teacher shimtsü, ANLB fund tashi itshitsü onüktem jembia liasü.

BILEMDANGANG

"Asen takum, asen mapa aser aseni inyakba ya tangar mulungjang nung teti alitsü."